

समे – 12:25 hrs.

<><><><><><>

PM-Russia-Arrival

प्रधानमंत्री नरेंद्र मोदी होर अज्ज मास्को च रूस दे राष्ट्रपति व्लादिमीर पुतिन हुंदे कन्नै भारत ते रूस बश्कार 22में सालाना शिखर सम्मेलन दी सह अध्यक्षता करंगन। सालाना शिखर सम्मेलन दौरान प्रधानमंत्री मोदी ते राष्ट्रपति पुतिन रक्षा बपार-निवेश सरबंधी, उर्जा सहयोग, शिक्षा, संस्कृति ते लोकें बश्कार आपसी संपर्क सने दपक्खी मुद्दें दी समीक्षा करंगन। ओह आपसी हितें दे क्षेत्रीय ते वैश्विक विकास पर बी अपना-अपना नजरिया सांझा करंगन। दवें नेता ब्रिक्स, शंघाई सहयोग संगठन, जी-20, पूर्वी एशिया, शिखर सम्मेलन ते संयुक्त राष्ट्र ज्नेय समूहें च दपक्खी सरबंधें दा आंकलन करंगन। मोदी होर रूस ते आस्ट्रिया दी त्रै दिनें दी आधिकारिक जातरा पर कल शामी मास्को पुज्जे हे। पुज्जने मगरा प्रधानमंत्री हुंदा स्वागत रूस दे उप प्रधानमंत्री होरें कीता। राष्ट्रपति पुतिन होरें कल शामी प्रधानमंत्री हुंदे आस्तै इक रातीं दी रूट्टी दा आयोजन कीता हा। प्रधानमंत्री मोदी होर अज्ज रूस च भारती समुदाय कन्नै गल्लबात करंगन। ओह क्रेमलिन च सैनिकें गी पुष्पांजलि अर्पित करंगन ते मास्को च प्रदर्शनी स्थल दा दौरा करंगन। एहदे मगरा प्रतिनिधिमंडल स्तर दी गल्लबात करने दा कार्यक्रम ऐ।

<><><><><><>

Add-PM

अपनी जातरा दे दुए चरण तैहत ओह् आस्ट्रिया दा दौरा लाडन। एह् प्रधानमंत्री नरेंद्र मोदी हुंदा आस्ट्रिया दा पैहला दौरा ऐ।

<><><><><><>

J&K Terror Attack

जम्मू प्रांतै दे कठुआ जिले च कल इक आतंकी हमले च फौज दे इक जे.सी.ओ सने 5 सैनिक शहीद होई गेन जिसले जे 5 दुए घायल होए देन। आकाशवाणी दे जम्मू संवाददाता दी जानकारी मुजब एह् हमला आतंकवादिएं जिले दी बिलावर सब डिविजन च पौंदे मच्छेडी इलाके दे बदनोता ग्रांs च कीता। जानकारी मुजब कल दपैहरी जिसले फौज दियां गड्डियां मच्छेडी - किंडली-मल्हार सड़कै पर गश्त पर हियां, उत्थे छप्पे दे आतंकवादिएं घात लाइए उंदे पर हमला कीता। आतंकवादिएं पैहले इक गड्डी पर ग्रेनेड सुट्टेया ते ओदे बाद आटोमैटिक थेआरें कन्नै अन्नेवाह गोलियां चलाना शुरू करी दिता। सुरक्षाबलें जवाबी गोलीबारी कीती पर आतंकवादी कन्नै लगदे जंगली इलाके च नस्सी गे। हमले आले इलाके च तुपाई अभियान चलाया जा'रदा ऐ। घायल सैनिकें गी इलाज लेई पुजाया गेआ। शहीद सैनिकें च नायब सूबेदार अनंत सिंह, हेड कांस्टेबल कमल सिंह, राइफलमैन अनुज सिंह, राइफलमैन असर्श सिंह ते नायक विनोद कुमार शामिल न।

<><><><><><>

Kathua

आतंकवादिएं दी धरपकड़ लेई व्यापक तपाशी अभियान चलाया गेआ। लाहके च तपाशी करा'रदे सुरक्षाबलें दी मदद लेई हेलीकाप्टर दी मदद ते यू.ए.वी निगरानी बी कीती जा रदी ऐ। खोजी कुते ते मेटल डिटेक्टर्स दी मदद बी लैती जा रदी ऐ। सेना, पुलिस ते सी.आर.पी.एफ आस्सेआ मच्छेडी, बदनोते, किंडली ते लोहाई थाहर सांझे तौर पर तपाशी अभियान चलाया जा रदा ऐ। त्रै थवां 4 आतंकवादी जिंदे च मते सारे विदेशी न, मन्नेया जा रदा ऐ जे उनें हमले गी अंजाम दिता ऐ। एह लोक उस्सै गिरोह दा हिस्सा न जेड़े बसंतगढ़ हमले च शामिल हे, जिंदे च इक विलेज डिफेंस गार्ड मोहम्मद शरीफ मारेआ गेआ हा। रक्षा मंत्री राजनाथ सिंह होरें सेना दे जोआनें पर होए दे आतंकवादी हमले दी खत लफजें च निंदेआ कीती ऐ। इक सोशल मीडिया पोस्ट च राजनाथ सिंह होरें हमले च शहीद होए दे सुरक्षाकर्मिएं दे परौआरें कन्ने दुख ते बसोस जाहिर कीता ऐ। उनें आखेआ जे दुख दी इस घड़ी च पूरा मुल्ख उंदे कन्ने ऐ। उनें आखेआ जे आतंकवाद रोधी अभियान जारी न ते सुरक्षाबल खिते च शांति ते रमानदारी बहाल रखने लेई बचनबद्ध न।

<><><><><><>

Shri Amarnath Yatra

अमरनाथ जी दी जातरा दे शुरू होने थवां लेइए हुनै तगर पवित्र गुफा च मत्था टेकने आलें दी गिनतरी 2 लक्ख दा आंकड़ा पार करी गई ऐ।

कल संगारे 24 ज्हार 879 श्रद्धालुएं दे पवित्र गुफा च शिवें दे हिमलिंग रूप दे दर्शन करने दे कन्नै गै अजें तोड़ी 3 ज्हार 880 मीटर दी उंचाई पर हिमालय दी गोदें च वाका अमरनाथें दी गुफा च हाजरी देने आले श्रद्धालुएं दी गिनतरी 2 लक्ख 7 ज्हार 16 तोड़ी पुज्जी गई। तोआई श्री अमरनाथ यात्रुएं दा अगला जत्था जम्मू दे भगवती नगर यात्री निवास बेस कैंप थमां अगड़ी यात्रा आस्तै कश्मीर घाटी लेई रवाना होआ। यात्रु 213 लौहकी-बड्डी गड्डिएं च अज्ज सबेरे जम्मू थमां निकले। एहदे च 4 ज्हार 203 मर्द, 1 ज्हार 117 महिलां, 18 न्याने, 83 साधु ते 12 साध्वियां शामिल न। 1 ज्हार 971 यात्रु बालटाल लेई ते 3 ज्हार 462 यात्रु पहलगाम आस्तै रवाना होए जित्थूं ओह अपनी अग्गे दी जातरा शुरू करंगन।

<><><><><><>

SC-NEET

सुप्रीम कोर्ट नै राष्ट्रीय पात्रता सह प्रवेश परीक्षा नीट यू.जी पेपर लीक मामले च केंद्र सरकार ते राष्ट्रीय परीक्षा एजेंसी एनटीए सोयां अदालतें च रिपोर्ट दाखल करने लेई आखेआ ऐ। सर्वोच्च अदालत नै सीबीआई सोयां मामले च अजें तगर दी अपनी जांच पर इक स्थिति रिपोर्ट दाखल करने लेई बी आखेआ। न्यायमूर्ति डी.वाई चंद्रचूड़, न्यायमूर्ति जे.बी पारदीवाला ते न्यायमूर्ति मनोज मिश्रा हुंदी पीठ नीट यू.जी म्तेहान कन्नै सरबंधत याचिकाएं दी सुनवाई करा रदी ही।

मुकख न्यायाधीश होंरें आखेआ जे परीक्षा दी पवित्रता कन्नै समझौता कीता गेआ ऐ जेदे पर कोई शक नेई। इस मामले दी अगली सुनवाई वीरवारें होग।

<><><><><><>

Poonch

पुंछ जिले दे कृष्णा घाटी सैक्टर आली कब्जा रेखा कन्नै लगदे लाहके च सेना नै इक पाकिस्तानी ड्रोन पर गोलियां चलाइयां जेदे चलदे ओह ड्रोन परतिए पाकिस्तान आली भेठा उठी गेआ। कब्जा रेखा पर तैनात बलें रातीं तकरीबन सवा 9 बजे संदिग्ध नकलोहरकत दिक्खी ते 5 रौंद दागे। पाकिस्तानी ड्रोन वापस परतोई गेआ, ओहदे कोई अद्धे घैंटे परैंत पाकिस्तानी ड्रोन गी भारत आली भेठा दिक्खआ गेआ जेदे चलदे सुरक्षाबलें गोलियां चलाइयां। सेना आस्सेआ अगेत्रे ग्राएं आले लाहकें च तपाशी अभियान चलाया गेआ ऐ तां जे इस गल्ला दा पता लाया जा जे ड्रोन आस्सेआ कोई हथियार जां फही नशीले पदार्थ ते नेई सुट्टे गए।

<><><><><><>

IMD-Weather

मौसम विभाग नै मुम्बई ते महाराष्ट्र दे किश हिस्सें च अगले 2 दिनें आस्तै भारी बरखा पौने दी पेशगोई कीती ऐ। मुम्बई महानगर क्षेत्र च केई इलाकें च पानी भरोची गेआ ऐ। रायगढ़, रत्नागिरी, सिंधुदुर्ग, पुणे, सतारा, कोलहापुर ते बुलढाना जिले दे किश क्षेत्रें च हाइ जनेई स्थिति बनी दी ऐ।

ताई जम्मू ते एहदे आले दोआले दे लाहकें च रातीं होई दी बरखा करी गुम्मे थवां लोकें गी
बड़ी मती राहत थोई ऐ। कल जम्मू च बद्दोबद्द तापमान 36 अशारिया 2 डिग्री सेल्यिस
दर्ज कीता गेआ।

<><><><><><>